

西  
夏  
書  
事

西夏書事卷三十四

青浦 吳廣成西齋 纂

宋欽宗靖康元年

金天會四年

夏元德八年春正月使賀

金正旦

金主始朝日禮畢方命各國使人入賀

二月圍杏子堡

賀正使回乾順知金人圍汴益急乘隙圍杏子堡  
堡在延州平戎砦北兩山對峙形勢險仄鄜延副  
總管劉光世據險拒守夏兵力攻不克

三月攻天德雲內武州及河東八館地取之

先是金將粘沒喝遣撒離母許割天德

金史西夏傳初以山

西與宋而天德遠在一隅  
緩急不可及故割以與夏

雲內金肅河清四軍河

東八館及宋武州之地約攻麟府以牽制河東兵

勢于是乾順遣兵萬人由金肅河清渡河盡取所

約地

夏四月掠河外諸砦破震威城殺知州事朱昭

政和中童貫于鐵爐骨堆築震威城距府州三百

里最爲孤絕乾順因金兵內侵知戍邊士卒入援

乘虛掠河外諸砦徑攻震威多設木鷲衝梯臨城  
飛矢雨射晝夜不息昭率城中老幼數百登陴拒  
守乾順令酋領悟兒思齊介胄衷氊以盾自蔽說  
昭降且數宋朝失信曰大金約吾共攻京師爲城  
下之盟畫河爲界太原旦暮且下麟府諸城悉歸  
于吾公何恃而不降昭披襟厲聲叱之思齊知不  
可奪以利啖守兵得登城昭盡殺妻子納尸于井  
勒衆搏戰中矢死

太白入東井

犯東扇北第一星

金人襲取天德諸城遣使請和不許

乾順既取天德諸城金帥兀朮以數萬騎陽爲出獵掩至諸城逐出守令悉取之惟金肅河清二軍在大河西尙爲夏有乾順懼請和金人執其使

按

宋之約金攻遼也初議山前山後十七州金人止歸燕京涿易順檀景薊諸地再請復與武朔二州而于夏則以拓跋雲中故地二千餘里遺之何重夏輕宋若此蓋宋藉其力以復幽燕

夏則出師赴難志在恤鄰故餌之不得不厚耳  
迨乾順進誓輸誠更禮受詔夏之不競已被金  
人窺破于是索戶口掠邊境掩取天德羈執使  
人非金之無情乃夏之自取也

金刼麟府豐三州地來歸秋七月知晉寧軍徐徽言  
復取之

宋同知樞密事聶昌奉使出河東金人刼之使割  
三州隸夏國乾順已設官置守三州與晉寧近晉  
寧軍民大恐訴于徽言曰棄三州晉寧豈能存徽

言曰此使人矯詔耳三州在河西夏豈能據率兵  
攻之乾順不能救守令皆降

八月寇涇原

統制李庠聚兵柏林堡拒之夏兵分番迭進庠兵  
潰涇原第三將曲端力戰乃卻

九月取西安州

元符中以南牟會新城建爲西安州

宋史張叔夜傳蘭州本漢

金城郡地最極邊西界有山曰天都介五路間羌人入寇必先至彼點集每一至則五路皆竦叔夜時爲錄事叅軍按其形勢爲攻取之策迄得在蘭之建爲西安州自是蘭無羌患與地理志異

州西北逼鄰夏境乾順襲取之

冬十月使賀金天清節

賀節使奏告謝罪請還所執人使金主遣之

故遼將小鞠鞞來奔助以兵使圍麟州建寧砦破之

小鞠鞞党項族

遼史作小斛祿

仕遼爲西南面招討使遼

亡嘗集襍羌十餘萬破豐州轉攻麟州兵敗父母

妻子盡失遂奔夏國乾順助以兵使圍麟州之建

寧砦越旬破之殺守將楊震

十一月破懷德軍



大觀中展平夏城作懷德軍與西安鎮戎相犄角  
應接蕭關乾順曾以三千騎攻之爲涇原第十將  
吳玠所敗及西安破懷德失援復遣太子某史失其名  
將兵攻之知軍事劉銓通判杜翊世拒守夏兵亘  
數十里困之翊世閤室自焚死銓被執太子素問  
銓名置之別室欲授以官銓大罵殺之

十二月攻蘭州入通川圓子諸堡大掠

蘭州恃河爲固每歲河冰合必嚴兵以備士不釋  
甲者累月元符中蘭州錄事參軍張叔夜築砦天

都山夏兵不敢窺境自西安懷德失守乾順遣兵

攻天都圍蘭州力攻五日大俘二堡人畜而還

靖康二年

九月高宗建炎元年金天會五年

夏正德元年春正月使

賀金正旦

金主以宋帝誓書地圖示使人使人稽首稱賀

三月復受割地于金改元

先是金奪天德諸城乾順屢以書責其背盟金主  
命畫陝西分界自麟府路洛陽溝距黃河西岸西  
歷暖泉堡鄜延路米脂谷至累勝砦環慶路威邊

砦逾九星原至委布谷口涇原路威川砦畧古蕭  
關北至谷川秦鳳路通懷堡至古會州距黃河依  
見流盡熙河路西邊以定封域其地有懸邈者亦  
相地勢從便分畫復分陝西北鄙以償天德雲內  
抵河爲界于是羣臣上表賀乾順肆赦國中改元  
德九年爲正德元年

夏五月取威戎軍

乾順遣將軍李遇兵取威戎城金將婆盧火先取  
之軍于城東遇前鋒將與戰不利遇至軍城北遣

書婁室曰夏國以天德雲內歸大國大國許我陝西北鄙之地是以此婁室命婆盧火撤兵退

秋九月出師從金人入寇

金帥兀朮回雲中遣保靜軍節度楊天吉至夏約寇陝西乾順許之出師屯于境上 宇文懋昭曰粘罕已嘗渝盟于夏而夏人又從之何哉蓋夏人非不知和好不可久也是時金國方強脇而從之亦欲因而擄掠耳

冬十月使賀金天清節

使臣奏請師期金主命俟副元帥宗弼檄至

十一月金人爲求侵地

宋通問使宣義郎傅勇見金左監軍完顏希尹于雲中希尹以國書授勇爲夏國請熙寧以來侵地蓋因前奪夏地欲責償于宋以報也

宋高宗建炎二年

金天會六年

夏正德二年春正月使賀

金正旦

金主問夏國事宜使者以歲饑告命發西南邊粟市之

陝西撫諭使謝亮來議和

乾順屢從金兵入邊高宗以主客員外郎謝亮爲  
陝西撫諭使從事郎何洋爲太學博士持詔諭乾  
順約和陝西制置使王庶遣亮書言夏國爲患小  
而緩金人爲患大而急况夏國秋稼不登飢餓困  
敝庶可保其無他閣下曷不持節督諸路兵先其  
急而後其緩亮不聽慶歷後中國使者常止宥州  
有偶至國中者與國主以賓禮見亮至乾順倨坐  
見之亮不敢爭

三月連金兵破鳳翔西京以檄索鄜延

乾順遣兵會金將婁室陷鳳翔長安隴右大震謀  
知關陝無備命宥州監軍司移檄延安言大金以  
鄜延割隸本國理當索取若敢違拒當行誅討帥  
臣王庶報曰金人初犯本朝嘗以金肅河清界汝  
今誰與守國家以奸臣貪得不恤鄰好遂至于此  
貪利之臣何國無之豈意夏國躬蹈覆轍比聞金  
人欲自涇原直擣興靈方切寒心不圖尙欲乘人  
之急幕府雖士卒單寡類皆節制之師左支右吾

尙堪一戰果能辦此何用多言乾順得檄不報

秋九月遣謝亮還以兵取定邊軍

乾順留亮數月僞與約和遣歸亮旣行潛以兵躡其後由多移嶺襲破定邊悉取其諸堡砦

冬十月使賀金天清節

金徙徽欽二帝于韓州使人隨羣臣表賀

十一月黜將軍李遇

遇自取威戎欲盡收關陝頻以兵擾鄜延王庶患其強遣謀入夏間之乾順心疑黜遇而收其兵



建炎三年

金天會七年

夏正德三年春正月使賀金正旦

金諸將兵破陝西諸郡蕃漢由綏德城逃入夏界者甚衆使人入見金主諭謹守邊備勿納流民

二月金使約兵入寇勿應

金婁室久圍晉寧軍不克遣使約夏國夾攻乾順恐晉寧破金兵日逼不應

秋七月取德靜砦

鄜延戎馬恠憊其東皆金兵西北卽夏境屬中國者惟鎮安一軍德靜一砦乾順攻德靜破之權帥

耿友諒僅以身免

冬十月使賀金天清節

金蒲察婁室悉取鄜坊二州地與夏境接壤乾順懼其兵威遣使先期至金主命仍隨高麗使同見

建炎四年

金天會八年

夏正德四年春正月使賀金正旦

宋兵敗于高橋高宗航海金將阿里蒲盧渾狀聞金主出示高麗夏二國使人以誇其強

太常卿謝亮復奉使來不納

開封尹宗澤疏請北伐乞使辨士西說夏國出兵

爲助知樞密張浚宣撫川陝亦奏請國書連夏高宗復以亮爲太常卿權宣府參議官再使夏國乾順聞其至拒不許入亮不得要領而還

冬十月使賀金天清節

金人立劉豫爲齊帝豫遣使謝封冊并賀天清節夏使遂班于齊使高麗使之下

環慶統制慕洵自慶陽來降

張浚富平之敗斬環慶經畧使趙哲哲將統制官

慕洵爲環州豪族

畢氏續資治通鑑慕洵作慕容洵意氏族中無慕氏單姓也攷

宋史种世衡傳知環州羌酋慕恩部落最强常得其死力諸部有貳者使討之無不克洵卽其後也  
單氏作遂自慶陽叛附夏國乾順納之  
慕容誤

十二月熙河副總管劉惟輔請附不納

金人寇熙河與惟輔戰不勝一日乘其出焚積聚襲敗之惟輔與親信數百匿山寺中遣人求附其

拒金兵乾順畏金不納已而金人執惟輔死之  
宋史

夏國傳紹興元年二月同州觀察副使劉惟輔輸款于夏夏人不受攷高宗紀建炎四年十二月壬辰金人犯熙州總管劉惟輔敗之殺五千人甲午再犯熙州惟輔軍潰被執死之傳紀不合

紹興元年  
金天會九年夏正德五年春正月使賀金正旦

乾順表內以不納熙河劉總管告金主賜資甚厚  
夏四月金使來索遼臣耶律大石

大石遼太祖八世孫仕遼爲都統林牙金兵入居  
庸關大石迎戰被執後乘間脫歸及遼亡大石率  
其部衆西行萬餘里歸者數國至起兒漫羣臣冊  
立爲帝稱西遼改元延慶金遣降將耶律余覲等  
至兀納水不得濟還報曰聞大石已駐兵和州之  
域必與夏國合勢金主遣使索之乾順報曰小國  
與和州地非接壤且不知大石所在也

冬十月使賀金天清節

和州回鶻執耶律大石之黨撒瓜迪里突迭獻于金主知夏國不與大石合使人入見諭慰之  
慕洵叛降于金

金將撒離喝攻慶陽破之慕洵乘勢取環州見金兵強遣使以城降

十一月川陝宣撫副使吳玠使以書來不報

川陝地金已十得其四時玠敗金將兀朮于和尚原西路稍通乃貽書夏國使背擊金人乾順不應

紹興二年

金天會十年

夏正德六年春正月使賀金正旦

時金以陝西地賜劉豫乾順遣使賀正請環慶二州金主不許

### 停行中國歷

故事每于上年孟冬受中國賜歷時高宗以乾順附金久不復頒賜自是不行中國歷

秋八月與金惡始遣使如川陝請通好

金主立陝西元帥府不欲以北鄙地與夏粘沒喝聚兵雲中將取川陝乾順恐其圖已舉國屯境上

備之並遣使至吳玠關師古軍中請通好

按

書請通好與之乎譏之也宋嘗兩使夏國乾  
順未嘗一應茲以金人圖已始使入請是畏金  
非懷宋也直書與金惡以著其非誠

九月金降人耶律余覲來奔不納

余覲遼宗室叛遼歸金爲西軍大監軍嘗將兵攻  
耶律大石于曷董城失其金牌粘沒喝疑其與大  
石通拘質其妻子余覲遂有叛心潛約燕京統軍  
槁里謀誅女真之在官在軍者天德知軍以告兀



木自雲中來聞而未信已獲余觀使人得其與槁里交通狀卽馳至燕京計殺槁里余觀父子假游獵名遁走夏國乾順遣官問有兵幾何以二三百對遂不納走塔坦被殺遼史余觀傳余觀降金復謀投夏夏人不納卒金史逆臣傳余觀謀反雲內節度耶律奴哥告之余觀亡去邊部斬之及其諸子首以獻二說不同攷宋史夏國傳余觀謀結燕雲之人圖女直粘罕覺欲誅之余觀父子遁入夏夏以其兵少不納洪皓松漠紀聞余觀有叛心約燕雲統軍反謀誅女直之在宮在軍者天德知軍偽許之遣其妻來告會陝西監軍兀室獵于居庸遇馳遞者詰之盡得其狀至雲中捕之余觀父子知覺以出獵爲名走入夏夏人問兵若干云二三百遂不納走塔坦塔坦先受兀室命使首領出迎具食帳中密以兵圍之余

觀出敵不勝

父子皆死

按

余觀爲遼宗室舉衆投金覆滅宗社梟獍之惡無以喻此是時乾順見惡金源方謀自固而能拒叛不納俾卽誅夷使殘遼稍伸餘恨亦義舉也

冬十月使賀金天清節

金主知乾順不納余觀待使人益加禮

十二月納契丹降戶立監軍司統之

余觀旣死兀朮分捕餘黨令諸路盡殺契丹降人

于是河東八館五百戶山金司乙室王府南北王府四部族衙諸契丹相溫酋首率衆蜂起亡入夏國乾順處之北鄙別立監軍司統之

紹興三年

金天會十一年

夏正德七年春正月使賀金正旦

金主以納契丹叛人詰責使人頓首謝罪

秋八月攻偽齊懷德軍不克

靖康中夏兵破懷德設兵戍之及金人以陝西地畀劉豫命夏國割懷德與之乾順心怏怏時豫寇伊陽知其無備以五萬衆攻之知軍事龐迪開門

以待夏兵疑不敢入迪以數千騎分門突出夏衆驚潰失軍資牛羊甚夥

冬十月使賀金天清節

使人與齊使同入見齊使以攻懷德告金主令持詔還諭責之

紹興四年

金天會十二年

夏正德八年春正月使賀金正旦

乾順命使人奏告請于陝西互市金主不許

夏四月金人復徵兵寇四川不應

金將兀朮攻仙人關與宣撫使吳玠戰于殺金平

大敗遣使徵兵乾順不應時金人銳志入蜀自撒離喝以下皆盡室行夏兵不至乃還鳳翔

按

徵者役使之辭也乾順拒之不從自是稍能自立矣

冬十月使賀金天清節

金主有疾不視朝命使人就館燕

十一月遣使如川陝請伐金

金主從劉豫請將使窩里哩撻懶等南侵陝西都統粘沒罕以前兩次徵兵不應請先弱夏然後取

宋乾順聞之遣使至四川言感朝廷德意願助兵  
伐金吳玠以聞

紹興五年

金熙宗仍稱天會十三年

夏大德元年春正月金使來

告哀及報卽位

太宗薨熙宗立乾順遣使弔并賀

夏五月歸孝子程俊母邵氏

俊會州人幼時父母陷于夏國常號泣自毀迨長  
捐家財數十萬往贖未至北向號泣寢食俱廢夏  
人感動還其母邵氏俊日夕承順奉養備至鄉里

稱爲至孝

按西夏風氣廣莫民俗強梗敢戰然能尙氣節重然諾故忠孝之事亦時取焉觀于前葬孟氏茲歸邵氏旌善之心出于至公惜乎典籍鮮存不能數觀也

秋九月以濮王仁忠爲中書令

仁忠性謹嚴持法峻人不敢干以私晉王察哥廣起第宅橫征多誅求蕃漢苦之仁忠上疏劾察哥爲之罷役朝野肅然乾順嘉其風力使由左樞密

進中書令察哥陰間之不得

紹興六年

金天會十四年

夏大德二年春正月使賀金正旦

及萬壽節

萬壽節熙宗誕也

夏六月金人以主名來報

僞齊劉豫表請金主以御名音切及同音字號降

示金主從禮臣議并報夏高麗二國

秋七月取樂州復取西寧州

夏國乳酪河與二州相近乾順遣兵襲取樂州進



攻西寧保塞綏邊諸砦俱潰守將棄城遁

冬十月遣兵越金界取亡馬于塔坦

乾順遣兵由河清渡河自雲中府路天德軍界追取所亡馬于塔坦得之而回往返皆不假道于金人亦不問 宇文懋昭曰昔粘罕嘗假道夏國以攻川陝夏人拒之今乃擅越金界以取亡馬蓋是時粘罕兀術皆罷軍事撤離喝爲陝西經畧使夏人知其無能爲也

西夏書事卷三十四終

西夏書事卷三十五

青浦 吳廣成西齋 纂

紹興七年

金天會十五年

夏大德三年春正月使賀金正旦

及萬壽節

金主朝太皇太后于明德宮夏使與高麗使同入賀

降蕃趙繼忠內奔

繼忠吐蕃瞎征子初名董合神宗時與兄木征以洮河降賜姓名授六宅副使西蕃三十八族大首

領梁乙逋與中國構難遣兵脇降之遂爲役屬至是因西川宣撫使請內附夏國遂失右臂

三月歲星逆行入輿鬼

犯積尸氣

夏四月太白入東井

與熒惑合

知西安州任得敬納其女爲妃

得敬本西安州判夏兵取西安率兵民出降乾順命權知州事有女年十七使其弟德聰飾之以獻

乾順納爲妃賞賚甚厚擢得敬爲靜州防禦使

秋九月遣使乞地于金金與以河外三州地

乾順旣得西寧與金積石等州鄰逼遣使以厚幣如金表乞河外諸州金主以積石樂廓三州與之時秦人在三州者數千皆願歸金金主請約之權樞密院事劉筈曰三小州不足爲輕重恐失兩國大信遂以其地來歸

紹興八年

金天眷元年

夏大德四年春正月使賀金正旦

及萬壽節請通互市

時齊國已廢金盡收陝西地乾順使請于綏德諸州互市金主以陝西新定不許

夏五月更積石州爲祈安城

積石蕃族强悍乾順以兵威脇之諸部皆服因更其城名祈安

秋八月立任氏爲皇后

任氏莊重寡言御下有恩意與曹氏並居妃位相得甚歡德敬欲后其女常以貨賄饋朝貴及宗室執政權者于是御史大夫芭里祖仁言古者天子

娶后藩國來媵諸侯一娶九女蓋奉宗廟廣繼嗣  
陰教之職不可缺中宮之位不可虛也伏見陛下  
兩妃並立位號相夷而無嫡以統之則勢必近爭  
情且生妬豈所以防淫慝塞禍亂乎今宜擇簪紱  
名家勲庸世族素優才行配合坤儀庶幾上協神  
祇之心下副臣民之望乾順詢之羣臣咸謂門第  
才德無過任妃乾順遂使芭里祖仁持冊立爲皇  
后授德敬靜州都統軍

冬十月邸延故將李世輔來奔

世輔青澗人世爲蘇尾九族巡檢金人陷延安與父永奇同被執授承宣使知同州世輔計執金帥撒離喝挈家歸朝行至洛河不得渡追兵及永奇與家屬二百口悉遇害世輔棄撒離喝以二十六人奔夏見乾順泣言父母妻子之亡願得二十萬人生擒撒離喝取陝西五路地歸夏國世輔亦得報不共之仇乾順許之授靜難軍承宣使鄜延岐雍等路經畧安撫使

紹興九年

金天眷二年

夏大德五年春正月使賀金正旦

及萬壽節

時高麗貢使未回金主賜燕夏使與高麗三使並會

太白焚戒合于井

司天謂不利用兵乾順不聽

二月李世輔討叛酋克之遂使樞密使王樞大將哆訛同出兵取陝西

世輔日請兵報仇乾順曰爾能爲國立功則不斷借兵時有別部酋豪青面夜叉爲邊患令世輔圖



之世輔以三千騎疾馳至其帳擒之以歸

名臣言行別錄

世輔卷甲疾趨抵其穴伏兵于旁岡阜間譟其三  
面虜倉卒惶駭夜叉金冠鐵面具畫如鬼物跨赤  
馳馬持大刀呼咤而出世輔謂之曰汝徒犬羊實  
不勇果勇能與我搏戰乎夜叉怒躍馬而前世輔  
預戒一騎俟與之交從旁馳過及鋒未交一騎出  
焉夜叉顧視世輔乘隙投槍手捽其背遂挾以歸  
其徒窘迫潰走伏兵乘之眾悉降與宋史顯忠傳異

乾順大悅將妻以女世

輔以父喪辭乃出二十萬騎以王樞喟訛爲陝西

招撫使世輔爲延安招撫使鼓行而東時月之十

四日也

金慕洧請降復納之以爲山訛首領

洧入金仕至熙河經畧使及金人與中國議和歸  
陝西河南地洧以官守隨例當留關中洧懼誅謀  
潛師襲取關陝涇原路經畧使張中彥與環慶趙  
彬合兵聲討洧兵敗亡入夏國乾順納之授以官

按

昔尹氏謂有國家者不患土地之不廣而患  
信義之不立自晚近互相傾奪輒以招降納叛  
爲能然終無益成敗之數特負不義之名而已  
慕洧反覆性成前車可鑒于其復至數其屢叛  
之罪執而戮之可也乃復延納授官幾成養虎

之患乾順真無識哉

三月攻府州取之

建炎中府州守將折可求以城降金撒離喝許廢  
劉豫立之及豫廢和議成割河南陝西歸中國府  
州在陝西屬中撒離喝恐可求失望生變假會飲  
酖殺之乾順知府州無主遣兵乘間取其城

夏四月靈芝生

在堂後官高守忠家百官表賀乾順作靈芝歌中  
書相王仁忠等和之勒石志瑞

按靈芝瑞草也生不兩月而乾順卒瑞乎非瑞乎書以爲喜言嘉祥者戒

五月李世輔執王樞嘯訛兵潰走還

世輔兵抵延安知金人議和陝西復歸中國購得害父母弟姪者殺之率舊部八百騎赴王樞嘯訛營諭之曰世輔已入延安見講和詔書招撫可以本部軍歸國嘯訛不從曰初經畧乞兵來取陝西今旣到此乃令歸耶世輔知勢不可抽刀斫嘯訛不及擒王樞縛之嘯訛縱鐵鷁軍來戰世輔以所

部拒揮雙刀馳逐所向披靡夏兵大潰殺死蹂踐者萬人失馬四百餘匹世輔遂以三千人歸朝

六月國主乾順卒子仁孝立

月之四日也年五十六

宋史夏國傳作年五十七攷乾順于宋哲宗元祐元

年六月嗣位時方三歲是年歲在丙寅至高宗紹興九年己未以甲子計之當年五十六宋史五十七蓋史臣以紀元計數而高宗建炎元年卽在位欽宗靖康二年九月或誤以一年作二年也在位

五十四年改元八諡曰聖文皇帝廟號崇宗墓號

顯陵長子仁孝立時年十六

馬端臨文獻通考云繼乾順立者正史作

天祈說誤中國以其屬于金遂廢冊命夏亦不使告哀

論曰乾順當紹聖乖方靖康厄運始則謀生不  
突繼則利享漁人不特義合葭蘆侵疆盡復而  
西寧湟鄯亦入版圖蓋摧堅者難爲功拉朽者  
易爲力也然受遼國百餘年卵覆之恩宜水一  
敗遽爾反顏則前之問起居請臨幸誠耶僞耶  
當是時地界扼陰山以北馬足遍關陝之西方  
謂藉茲新盟大啟爾宇而難生天德兵聚雲中  
向之臣宋臣遼惟吾披猖者至金而故技莫施  
焉四川之使悔亦晚矣惟是元昊製蕃書立蕃

學久絕華風乾順建國學置養賢務他時仁孝  
重聖親賢貽謀有自亶其然乎

秋九月遣使如金告哀

按此西夏告哀金國之始

冬十月王樞還

初樞被擒入中國境卽望闕遙拜言夏國主感聖  
恩將遣使入貢宣諭使周聿遣人護送行在樞密  
院樓炤言陝西新復正與夏國爲鄰留之無益還  
之可使知恩乃引見行燕犒禮并其俘百九十人

皆遣還命人伴送至界上

十一月尊母任氏曹氏爲太后

任氏年少于曹仁孝兩母並尊奉養禮秩如一

歸鄜延諸路陷國軍民

宋邊吏招納仁孝因王樞還悉縱遣之

紹興十年

金天眷三年

夏大慶元年春正月使賀金正旦

及萬壽節

金制夏使入見金主卽御座鳴鞭報時畢臣僚行  
小起居禮至是改爲大起居



二月立后罔氏

罔氏西夏大族后聰慧知書愛行漢禮仁孝先納之見其賢立爲后頗愛敬焉

按西夏立后不悉書此書賢罔氏也氏好禮知書異時仁孝建學諸善政后有勞焉

三月川陝宣撫使胡世將遣使來諭入貢不報

乾順臣金後不復貢中國高宗因金人議和畫界已定命郵延秦鳳熙河諸路招納陷沒夏國人民并命世將遣使至國議入貢禮仁孝不應

夏四月夏州統軍李合達據城叛

合達本蕭姓爲遼國撻馬扈成安公主至夏有口才驍勇長騎射乾順留之始授文思使轉右侍禁嘗從征討有勞陞副都統賜國姓統安之役諸將畏劉法勇莫敢當其鋒合達奮擊敗之率死士數百人追至葢朱峴得法首還以功擢都統鎮夏州繼乾順臣金上書切諫不聽及公主卒益怏怏不自適聞耶律大石在西域遣間使訪之不得要領而返是時因仁孝新立自恃宿將有功謀作亂都

押牙劉洪裕不從削髮逃去合達盡散家財給軍士據州城叛遣兵四出俶擾

五月金使冊仁孝爲夏國王

金主遣尙輦局使完顏衷賚封冊至命仁孝爲夏國王加開府儀同三司上柱國

六月合達圍西平府

合達遣使至陰山結乙室耶刺舊部議立遼後其約恢復于是河東八館山金司南北王府前置北鄙諸契丹蜂起應之合衆數萬圍靈州監軍司使

問存禮拒戰數敗

秋七月合達分兵陷鹽州

合達分遣契丹諸部襲鹽州州城低陋半夜破之  
據鹽池發倉庫盡掠諸州所牧地遊騎直逼賀蘭  
興州大震

八月靜州統軍任得敬請兵討夏州

合達遣使以重幣約河南諸州同叛或拒之不納  
或執使以獻獨得敬善待使入探問賊中機事盡  
得其實乃上表言賊素無謀衆皆烏合所恃者契

丹餘部以戚里連謀然其勢易離也陛下誠下令  
安撫赦其已往許其自新約還舊部給以資糧當  
必有嚮應者又賊頓兵靈武已逾兩月今新破鹽  
州士氣驕甚夏州距靈州五百餘里定然無備臣  
請以州兵合諸將襲之可獲全勝仁孝遂命得敬  
出師

九月謝金賻贈及封冊

獻馬馳各二百匹

冬十月任得敬復夏州

得敬聞命陰爲部署外示閒暇一日晨起選精卒三百往夏州盡縛其守烽卒繼以驍騎五千疾馳入城賊衆倉皇接戰皆潰走盡獲合達妻孥撫諭兵民開倉賑給夏州遂定

進攻鹽州擊蕭合達大破之合達走死

合達聞夏州已失急解靈州圍迴救部衆散亡者甚夥諸契丹亦走回本部至鹽州與得敬遇得敬揮衆擊之合達兵敗策馬北奔至黃河口不得渡從人斬首來獻

十二月以任得敬爲翔慶軍都統軍封西平公

得敬獻捷仁孝欲擢內職濮王仁忠言得敬兵威震懾河南今大亂甫平遽解兵柄非所以靖反側也宜崇其爵秩以係軍民之望仁孝授以都統軍封西平公賞賚甚厚

紹興十一年

金皇統元年

夏大慶二年春正月使賀金正

旦請上尊號

使者隨金羣臣請上尊號凡三請始允金主賜二品以上官宴夏使與高麗使與焉

賀金萬壽節請置榷場

金主許置于蘭州保安綏德三處

夏四月慕洧取新泉進寇會州

爲守將朱勇所敗洧忿將益師入侵川陝宣撫使胡世將遺書勉以忠義洧愧而止

六月慕洧與弟濬謀叛伏誅

濬仕夏爲樞密使時金人渝盟復取陝西地濬思歸金與洧謀挈族走遣使求金策應過靈州邏者獲之統軍任得敬以聞仁孝遣兵殺洧濬夷其族



金史西夏傳慕洧奔夏及撒離喝再定陝西洧謀歸夏人知之遂族洧宋史夏國傳十一年夏六月慕洧與弟濬謀反伏誅二傳不合

按于時叛夏者濬也主以洧何屬罪于長且懲反覆也慕洧去就輕忽至是兄弟族誅可謂正其罪矣

秋七月金使來詰

仁孝以誅慕洧故表聞于金金主詰其專擅仁孝報使謝之

八月受尊號

羣臣上仁孝尊號曰制義去邪

按尊號之上事本非古仁孝立甫逾年未有功德斯民而覲顏受之不二年而饑饉薦臻泉湧地裂豈非天示之警耶

冬十二月賀金受尊號

金主亶受羣臣尊號初御袞冕

紹興十二年金皇統二年夏大慶三年春正月使賀金正

旦及萬壽節

金制以宋使列三品班夏與高麗使列五品班至

是金主重定臣使辭見班品如舊殿前班及臣僚

復用小起居禮

大金集禮臣使入見儀金主卽御座殿前班小起居畢先引宋使副

左入禮畢右出次引高麗使左入至丹墀北嚮從  
左上露階立定橫使鞠躬正使少前拜跪附奏畢  
拜起復位立閤使宣問高麗王時並鞠躬受敕旨  
畢再揖橫使鞠躬正使少前拜跪奏畢拜起復位  
引右下至丹墀面殿立禮物右入左出盡揖使如  
墀通一十七拜各祗候引左階立次引夏使見如  
上儀引右階立次再引至丹墀與高麗使並鞠躬  
有敕賜酒食舞蹈五拜各引右出其朝辭儀金主  
卽御座羣臣行小起居先引夏使左入傍折通班  
至丹墀再拜不出班奏聖躬萬福又再拜揖使副  
鞠躬使出班戀闕致詞復位又再拜引右出次引  
高麗使如上儀次引宋使副入禮畢各引右出

夏六月金晉寧軍守折彥文侵府州

河東折氏世守麟府以抗夏及可求降金死乾順  
襲據府州夷折氏墳隴戮其屍折氏怨之入骨已  
金使可求子彥文守晉寧欲挑隙遣兵入府州境  
大掠據寧邊砦州兵逐之不退

秋八月攻金晉寧軍

仁孝聞折氏報怨遣兵攻晉寧彥文不出戰拒守  
二十日夏兵不能克取通秦堡而還

九月饑

民間升米百錢

冬十月金使來歸侵地

折彥文以夏兵掠地罪聞金主命太原尹張奕按視之奕言折氏與夏國世仇故開邊隙以報之耳請徙折氏他郡則夏自安金主命彥文移守青州遣使諭夏國令各歸侵土謹守疆場仁孝從之

紹興十三年

金皇統三年

夏大慶四年春正月使賀金正

旦

金主以太子濟安薨不御正殿使人止詣皇極殿遙賀萬壽節亦如之

三月地震

有聲如雷逾月不止壞官私廬舍城壁人畜死者  
萬數

夏四月夏州地裂泉湧

出黑沙阜高數丈廣若長堤林木皆沒陷民居數  
千御史大夫蘇執義言自王畿地震人畜災傷今  
夏州又見變異是天之所以示警于陛下也不可  
不察于是仁孝下令曰二州人民遭地震地陷死  
者二人免租稅三年一人免租稅二年傷者免租

稅一年其廬舍城壁摧塌者令有司修復之

秋七月大饑諸州盜起

諸部無食羣起爲盜威州大斌靜州埋慶定州  
浪富兒等族多者萬人少者五六千四行劫掠直  
犯州城州將出兵擊之不克

八月行賑法

郡縣連章告急諸臣請兵討擊樞密承旨蘇執禮  
言此本良民因飢生事非盜賊比也今宜救其凍  
餒計其身家則死者可生聚者自散所謂救荒之

術卽靖亂之方若徒恃兵威誅殺無辜豈所以培  
養國脉乎仁孝善之命諸州按視災荒輕重廣立  
井里賑恤執禮執義弟也

冬十月西平都統軍任得敬討諸州盜平之

得敬遣官撫諭諸盜宥其首惡解散餘黨諸亂漸  
平惟定州筵浪富兒二族恃險拒守得敬夜發兵  
襲其砦擒首領哆訛誅之餘衆泥首降

紹興十四年

金皇統四年

夏人慶元年春正月使賀金正

旦及萬壽節



時中國復與金和遣賀使至夏使與高麗使同班  
其後大金集禮元旦聖節上壽儀金主陞御座皇  
太子及合班臣僚儀畢始引宋國人從至丹  
墀再拜不出班奏聖躬萬福再拜喝有敕賜酒食  
又再拜各祇候平立引左廊立次引高麗夏人從  
如上儀畢分引左右廊立御果牀入進酒金主飲  
則坐宴侍立臣皆再拜進酒官接盞還位坐宴官  
再拜復坐行酒傳宣立飲訖再拜坐次從人再拜  
坐食入七盞曲將終揖從人立再拜畢引出聞曲  
時揖臣使起再拜下殿至丹墀合班謝宴各祇候分引出

夏五月遣使人賀天申節

夏國賀使不至中國者近二十年仁孝心慕正朔  
遣間使人賀獻珠一囊金帶一衣七對綾羅紗五

百疋馬百匹

按夏自靖康以後爲金人阻隔朝貢之儀久不復見仁孝遣使賀節可謂知禮矣

六月令州縣各立學校

國中增弟子員至三千人

按此西夏立學校之始

復立小學于禁中

凡宗室子孫七歲至十五歲皆得入學設教授仁孝與后罔氏亦時爲條教訓導之

秋九月彗星見改元

星見坤宮五十餘日而滅占其分野在夏國羣臣  
上言彗者除舊布新之象宜改元應之遂以大慶  
五年爲人慶元年

按彗有五色蒼則王侯破天子苦兵赤則賊盜  
冗強國恣黃則女害色權奪后妃白則將軍逆  
二年兵大作黑則水精賊江湖決處處賊起總  
之妖星足以致災長大見久則災深短小見不  
久則災狹誠齋楊氏曰惟天愛君惟聖畏天天

之于君厭之則驕以嘉祥愛之則謹以變異絕  
之則侈以强盛念之則懼以災祲今仁孝善政  
聿新有光前列彗星之見其在愛之念之之列  
耶抑杜預所謂彗有除舊布新之象乎然終仁  
孝世無大禍害意其尊師重學節用愛人有以  
弭其患也

冬十二月遣使入賀正旦

獻金酒器六事色綾羅紗縠三百疋

宋史高宗本紀不載入賀

二事據宇文懋昭大金國志錄之攷夏國傳紹興  
二十九年歸宋官李宗閏上書言夏國副使屈移

嘗兩使南朝以爲衣冠禮  
樂非他國比意卽指此

西夏書事卷三十五終